



Broj: 07-05-04-45131-84/23
Sarajevo, 30.11.2023. godine

KANTON SARAJEVO
Skupština Kantona Sarajevo
- o v d j e -

Predmet: Odgovor na zastupničku inicijativu Kluba zastupnika Demokratske fronte od 06.11.2023. godine, d o s t a v l j a s e

Klub zastupnika Demokratske fronte je u okviru Desete radne sjednice Skupštine Kantona Sarajevo, u skladu sa članom 213. stav (1) Poslovnika Skupštine Kantona Sarajevo ("Službene novine Kntona Sarajevo", br. 41/12 - Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22 i 17/22 - Ispravka), dana 06.11.2023. godine, uputio zastupničku inicijativu, koja glasi: "Upućujemo hitnu inicijativu radi saniranja štete nastale usljed požara otvorene pijace 'Kvadrant' na sljedeći način:

1. Zadužujemo Vladu Kantona Sarajevo da obezbijedi učešće drugih kantonalnih preduzeća u akciji čišćenja prostora pijace koja je devastirana požarom
2. Zadužujemo Vladu Kantona Sarajevo da obezbijedi jednokratnu pomoć za vlasnike, korisnike i radnike otvorene pijace 'Kvadrant' do početka rada nove otvorene pijace
3. Zadužujemo Vladu Kantona Sarajevo da obezbijedi plaćanje naknade za zakupninu prostora za one vlasnike poslovnih objekata koje žele nastaviti rad na drugim lokacijama
4. Zadužujemo Vladu Kantona Sarajevo da obezbijedi iznos od 500.000 KM za KJKP Tržnice -. pijace d.o.o. na period od dvije godine radi plaćanja naknade za zakupninu u ime vlasnika poslovnih prostora koji će nastaviti rad na obnovljenoj otvorenoj pijaci 'Kvadrant'

Obrazloženje:

Dana 05.11.2023. godine požar je zahvatio čitavu površinu otvorene pijace 'Kvadrant' U ovoj tragediji uništeno je 185 boksova, poslovnih objekata, robe velike vrijednosti i 55 korisnika ostalo je bez egzistencije. Obzirom da je većini korisnika prodaja na ovoj pijaci bila jedini izvor prihoda važno je obezbijediti jednokratnu pomoć do ponovnog rada otvorene pijace i omogućiti refundiranje troškova uništene robe kroz refundiranje naknade za zakupninu prostora. Iznos od 500.000 KM je približan godišnji iznos prihoda koje KJKP Tržnice - pijace d.o.o. ostvaruju za zakupninu poslovnih prostora.

Oslobađanjem vlasnika/ korisnika poslovnih prostora od ovih troškova u periodu od dvije godine velika je podrška za njihovu egzistenciju i poslovni oporavak. Važno je pružiti podršku i KJKP Tržnice-pijace u vidu obezbjeđenja učešća drugih kantonalnih preduzeća koji će pomoći u čišćenju devastiranog prostora nakon požara."

Odgovor Ministarstva privrede Kantona Sarajevo:

Vezano za predmetnu inicijativu Kluba zastupnika Demokratske fronte, Ministarstvo privrede Kantona Sarajevo izjašnjava se, kako slijedi:



Na osnovu člana 29. Zakona o izvršavanju Budžeta Kantona Sarajevo za 2023. godinu ("Službene novine Kantona Sarajevo", broj 15/23), a na prijedlog Ministarstva privrede Kantona Sarajevo, Vlada Kantona Sarajevo je donijela Odluku, broj: 02-04-50372-1/23 od 28.11.2023. godine kojom je usvojila Program utroška sredstava utvrđenih na razdjelu 18. Budžeta Kantona Sarajevo za 2023. godinu, na poziciji "Fond podrške privredi zbog posljedica izazvanih pandemijom koronavirusa i elementarnim nepogodama", broj: 02-04-50372-1.1/23 od 28.11.2023. godine (u daljnjem tekstu: Program).

Program je dokument kojim se programira finansiranje provođenja Mjere podrške likvidnosti u svrhu očuvanja radnih mjesta kod subjekata - zakupaca na pijaci "Kvadrant" koji su pogođeni elementarnom nepogodom, tj. požarom koji se desio dana 5.11.2023. godine. Program sadrži: osnovne informacije o požaru na pijaci "Kvadrant", ukupan planirani iznos sredstava za provođenje Programa, popis subjekata koji su obuhvaćeni Programom, maksimalni iznos sredstava koji se dodjeljuje subjektu koji je obuhvaćen Programom; namjenu utroška odobrenih sredstava; uslove u postupku izbora korisnika sredstava, osnovne informacije o Javnom pozivu za finansiranje provođenja Mjere podrške likvidnosti u svrhu očuvanja radnih mjesta kod subjekata - zakupaca na pijaci "Kvadrant" koji su pogođeni elementarnom nepogodom, odnosno požarom koji se desio dana 5.11.2023. godine (u daljnjem tekstu: Javni poziv), sadržaj prijave na Javni poziv, osnovne elemente ugovora o realizaciji odobrenih sredstava, osnovne detalje o potrebi izrade informacije o realizaciji odobrenih sredstava i druge potrebne programske elemente.

Naime, kao što je poznato, dana 5.11.2023. godine u 13:00 sati desio se požar na pijaci "Kvadrant" u sarajevskom naselju Otoka, ulica Džemala Bijedića broj 27, 71000 Sarajevo. U navedenom požaru izgorjeli su boksovi KJKP "Tržnice-pijace" d.o.o. Sarajevo zajedno sa imovinom/robom zakupaca na predmetnom lokalitetu. S obzirom na činjenicu da je požar na pijaci "Kvadrant" ugrozio egzistenciju zakupaca kojima je rad na ovoj pijaci jedini izvor prihoda, dana 7.11.2023. godine, u prostorijama Vlade Kantona Sarajevo održan je sastanak kojem su prisustvovali premijer Vlade Kantona Sarajevo, ministar Ministarstva privrede Kantona Sarajevo, ministar Ministarstva komunalne privrede, infrastrukture, prostornog uređenja, građenja i zaštite okoliša Kantona Sarajevo, direktor KJKP "Tržnice-pijace" d.o.o. Sarajevo i nekoliko zakupaca, a na ovom sastanku razgovaralo se o modalitetima pomoći zakupcima pogođenim požarom koji se desio 5.11.2023. godine. Shodno dogovoru sa prednje navedenog sastanka, a u svrhu izrade predmetnog Programa, KJKP "Tržnice-pijace" d.o.o. Sarajevo dostavilo je Ministarstvu privrede akt, broj: 2875/23 od 09.11.2023. godine uz koji je priložen "Spisak korisnika usluge zakupaca prodajnog kioska zatvorene tezge na PJ "Kvadrant"". Subjekti sa Spiska obuhvaćeni Programom predstavljeni su u Poglavlju IV Programa i isti imaju pravo na dodjelu sredstava po istom.

Ukupan planirani iznos sredstava (limit) za provođenje Programa je 300.000,00 KM (slovima: tristotinehiljada konvertibilnih maraka), a ova finansijska sredstva utvrđena su na razdjelu 18. u Budžetu Kantona Sarajevo za 2023. godinu, na poziciji "Fond podrške privredi zbog posljedica izazvanih pandemijom koronavirusa i elementarnim nepogodama", ekonomski kod 614500, subanalitika IAP 001.

Iznos sredstava koji se dodjeljuje subjektu koji je obuhvaćen Programom je iznos koji je jednak iznosu tri najniže plaće u Federaciji BiH, a prema Odluci o iznosu najniže plaće za 2023. godinu ("Službene novine Federacije BiH", broj 2/23) sa pripadajućim porezima i doprinosima i to po licu sa liste osiguranika ovog subjekta, tj. ukupni iznos od 3.052,98 KM po licu sa liste osiguranika odnosnog subjekta. Ukoliko se utvrdi da je nakon obrade svih prijava po Javnom pozivu, za isplatu prednje navedenog iznosa sredstava potrebno prekoračiti limit od 300.000,00 KM, pojedinačni iznos koji se po licu sa liste osiguranika dodjeljuje subjektu koji je obuhvaćen Programom proporcionalno se umanjuje u skladu sa ovim limitom.



Kada je u pitanju namjena utroška sredstava, Korisnik sredstava je obavezan da odobrena sredstva po ovom Programu, a nakon zaključenog ugovora sa Ministarstvom privrede Kantona Sarajevo, utroši za troškove nužne za redovno poslovanje (nabavka roba i usluga za redovno poslovanje, operativni troškovi poslovanja, plaće radnika). Ministarstvo privrede Kantona Sarajevo će za sva neopravdana sredstva pokrenuti proceduru povrata sredstava uz pripadajuću zakonsku zateznu kamatu. Korisnik sredstava obavezan je sačiniti Izvještaj o utrošku odobrenih sredstava sa stanjem na dan isteka tri mjeseca od dana isplate sredstava po zaključenom ugovoru o dodjeli odobrenih sredstava sa Ministarstvom privrede Kantona Sarajevo, uz priložene odgovarajuće dokaze o namjenski utrošenim sredstvima za troškove redovnog poslovanja. Korisnik sredstava obavezan je zadržati sve radnike uposlene na dan objave Javnog poziva, a isto dokazuje dostavljanjem uvjerenja nadležne porezne uprave o izmirenim direktnim porezima i doprinosima, zajedno sa listom osiguranika za svaki odnosni mjesec u periodu počevši od dana objave Javnog poziva do dana sačinjavanja predmetnog izvještaja. Prekid radnog odnosa sa nekim od radnika sa Liste osiguranika dostavljene sa danom objave Javnog poziva bit će opravdan isključivo ako korisnik sredstava uz Izvještaj o utrošku sredstava dostavi i sporazumni raskid ugovora o radu sa odnosnim radnikom ili dokaz o jednostranom raskidu radnog odnosa od strane odnosnog radnika. Izvještaj o utrošku sredstava na propisanom Obrascu, korisnik sredstava dužan je dostaviti u roku od četiri mjeseca od dana isplate odobrenih sredstava.

Pravo na dodjelu sredstava po Programu može ostvariti subjekt obuhvaćen Programom koji podnese prijavu na Javni poziv, koji je registrovan za obavljanje djelatnosti, ima sjedište na području Kantona Sarajevo, koji je dostavio prijavu u skladu sa Javnim pozivom i koji ispunjava sve ostale uslove iz Javnog poziva.

Javni poziv Ministarstvo privrede Kantona Sarajevo objavilo je na svojoj web stranici dana 30.11.2023. godine, a Obavještenje o Javnom pozivu bit će objavljeno u dnevnom listu "Dnevni avaz" dana 01.12.2023. godine. Rok za dostavljanje prijave je 16.12.2023, a procedura zaključenja ugovora o realizaciji odobrenih sredstava sa odabranim korisnicima ovih sredstava bit će okončana do kraja tekuće kalendarske godine.

S poštovanjem,



Dostaviti:

1. Naslovu,
2. Vlada Kantona Sarajevo,
3. Evidencija i
4. a/a.

